

1. Športska pravna osoba, koja otpočne s radom, prije nego što Ministarstvo utvrdi da ispunjava propisane uvjete (Članak 38. ovog Zakona);

2. Športska pravna osoba, koja ne osigura izvršenje aktivnog zdravstvenog osiguranja športista, članova športske pravne osobe (Članak 39. ovog Zakona);

3. Osnivač, ako ne donese akt o prestanku športske pravne osobe (Članak 43. stavak 1. ovog Zakona);

4. Organizator športske priredbe, ako ne postupi sukladno propisima iz Anti-doping konvencije Savjeta Evrope i odlukama Međunarodnog olimpijskog komiteta (Članak 62. ovog Zakona);

5. Športska pravna osoba zbog donošenja opasnih oruđa i oružja, i upotrebljavanje pirotehničkih sredstava kojim bi mogla biti ugrožena sigurnost športista i gledatelja (Članak 75. ovog Zakona).

6. Športska pravna osoba koja ne poduzme mjere za zaštitu sigurnosti i žurne medicinske pomoći pri održavanju športskih priredbi (Članak 76. ovog Zakona),

Za prekršaj iz stavka 1. ovog članka kaznit će se i odgovorna osoba u športskoj pravnoj osobi novčanom kaznom od 200,00 KM do 2.000,00 KM.

#### Članak 80.

Novčanom kaznom od 200,00 KM do 2.500,00 KM kaznit će se za prekršaj športska pravna osoba:

1. ako otpočne s radom prije upisa u Registar (Članak 40. ovog Zakona);

2. ako zahtijeva od športiste da trenira ili se takmiči za vrijeme bolesti ili povrede (Članak 61. ovog Zakona);

3. ako dozvoli prodavanje i točenje alkoholnih pića suprotno članku 72. ovog Zakona;

4. ako dozvoli pristup osobama pod utjecajem alkohola i drugih sredstava na takmičenje što može ugroziti sigurnost športista, gledatelja i ostalih učesnika na športskoj priredbi suprotno članku 73. ovog Zakona;

5. ako dopusti objavljivanje oglasa i reklama po zdravlje štetnih proizvoda suprotno članku 74. ovog Zakona;

Za prekršaj iz stavka 1. ovog članka kaznit će se i odgovorna osoba u športskoj pravnoj osobi novčanom kaznom od 100,00 KM do 1.000,00 KM.

## XII. PRIJELAZNE I ZAVRŠNE ODREDBE

#### Članak 81.

Postojeće pravne osobe, koje obavljaju djelatnost iz oblasti športa, dužne su u roku od godinu dana od dana stupanja na snagu ovog Zakona, uskladiti svoju organizaciju, djelatnost i opće akte s odredbama ovog Zakona.

#### Članak 82.

Fizičke osobe, koje obavljaju djelatnosti u oblasti športa kao privatni športski djelatnici ili kao profesionalni športisti dužni su da se upišu u Registar privatnih športskih djelatnika, odnosno Registar profesionalnih športista, u roku od godinu dana od donošenja podzakonskih akata o sadržaju, obliku i načinu vođenja postupka upisa i brisanja iz ovih registara, iz članka 55. i članka 56. ovog Zakona.

#### Članak 83.

Djelatnici u oblasti športa, koji u vrijeme stupanja na snagu ovog Zakona ne ispunjavaju uvjete naobrazbe propisane ovim Zakonom, mogu nastaviti obavljanje odgojno-naobrazbenog rada u športu s postojećom stručnom spremom.

Djelatnici, iz stavka 1. ovog članka, dužni su, u roku od 6 godina od stupanja na snagu ovog Zakona, ispuniti propisane uvjete.

Ukoliko ne ispune propisane uvjete, djelatnicima iz stavka 2. ovog članka, prestaje radni odnos.

#### Članak 84.

Športski djelatnici, koji nemaju položen stručni ispit iz oblasti športa do stupanja na snagu ovog Zakona, mogu nastaviti da obavljaju svoj posao, pod uvjetom da polože stručni ispit u roku od dvije godine od dana stupanja na snagu ovog Zakona..

#### Članak 85.

Vlada Kantona će imenovati Savjet za šport u roku od tri mjeseca od dana stupanja na snagu ovog Zakona.

#### Članak 86.

Podzakonski akti za izvršenje ovog Zakona bit će doneseni u roku od godinu dana od dana stupanja na snagu ovog Zakona.

#### Članak 87.

Ovaj Zakon stupa na snagu osmog dana od dana objavljivanja u "Službenim novinama Tuzlanskog kantona".

Bosna i Hercegovina  
Federacija Bosne i Hercegovine  
TUZLANSKI KANTON  
Sabor

Broj: 01-011-218-18/00  
Tuzla, 18. 11. 2000. godine

Predsjednik  
Sabora Tuzlanskog kantona,

**Dr. Izet Žigić, v.r.**

## 590

Na osnovu poglavlja IV, odjeljak B, člana 33. stav 1. tačka e) Ustava Tuzlanskog kantona, donosim

## UKAZ

### O PROGLAŠENJU ZAKONA O OTPADU

Proglašava se Zakon o otpadu, koji je donijela Skupština Tuzlanskog kantona na sjednici od 2. 11. 2000. godine.

Broj: 01/1-02-1792/00  
Tuzla, 8. 11. 2000. g.

Predsjednik  
Tuzlanskog kantona  
**Dr. Tarik Arapčić, v.r.**

## ZAKON

### O OTPADU

#### I. OPĆE ODREDBE

##### Član 1.

Ovim Zakonom se uređuju prava, obaveze i odgovornosti pravnih i fizičkih lica koja proizvode i postupaju sa otpadom na području Tuzlanskog kantona (u daljem tekstu: Kanton).

Odredbe ovog Zakona uređuju način i uslove sabiranja, transporta, prerade i deponovanja otpada na uređenim deponijama, održavanje deponija, kao i vršenje prometa otpada.

Način postupanja sa radioaktivnim otpadom i sa otpadnim materijama i predmetima koji se ispuštaju u površinske vode, kanalizacionu mrežu i zrak, kao i predmetima koji su korišteni sa izvorima jonizirajućeg zračenja, uređuju se posebnim propisima.

#### Član 2.

U postupanju sa otpadom poštivat će se propisi o zaštiti okolice i propisi međunarodnog prava koji regulišu oblast zaštite okolice.

#### Član 3.

Otpad su, po ovom Zakonu, materije i predmeti, koje je pravno ili fizičko lice odbacilo ili odložilo, namjerava ih ili mora odložiti.

#### Član 4.

U smislu ovog Zakona, ne smatra se otpadom plodno i potencijalno plodno poljoprivredno zemljište koje će korisnik, odnosno investitor skinuti i sačuvati u momentu promjene namjene poljoprivrednog zemljišta.

#### Član 5.

Pojmovi koji se koriste u ovom Zakonu imaju slijedeće značenje:

Otpad po mjestu nastanka:

- komunalni otpad je otpad iz domaćinstva, otpad koji nastaje čišćenjem javnih površina i otpad koji nastaje u privrednim i uslužnim djelatnostima a isti je vrlo sličan otpadu iz domaćinstva i otpadu koji nastaje čišćenjem javnih površina,

- tehnološki otpad je otpad koji nastaje u proizvodnim procesima u privrednim i uslužnim djelatnostima, a po količinama, sastavu i svojstvu razlikuje se od komunalnog otpada.

Otpad po svojstvima:

- opasni otpad je utvrđen Konvencijom o nadzoru prekograničnog prometa opasnog otpada i njegovom odlaganju (Bazel, 22.3.1989. godine). Opasni otpad sadrži materije koje imaju jedno od ovih svojstava: eksplozivnost, reaktivnost, zapaljivost, nagrizanje, nadražljivost, štetnost, toksičnost, infektivnost, kancerogenost, mutagenost, ekotoksičnost i svojstvo otpuštanja otrovnih plinova hemijskom reakcijom ili biološkom razgradnjom.

Komunalni i tehnološki otpad svrstavaju se u opasni otpad ako sadrže materije koje imaju jedno od pomenutih svojstava.

Ostali pojmovi:

- inertni otpad je otpad koji uopće ne sadrži ili sadrži malo materija koje podliježu fizikalnoj, hemijskoj i biološkoj razgradnji, pa ne ugrožava okolicu.

- ambalažni otpad je ambalaža koja ostane nakon što se proizvod otpakuje.

- poseban otpad je otpad koji nastaje u medicinsko-zdravstvenim institucijama (stacionari, ambulante, poliklinike i bolnice), naučnoistraživačkim i razvojnim institucijama (instituti), laboratorijima (istraživački, razvojni i kontrolni), kao produkt upotrebe sredstava i materijala za liječenje, istraživanje i kontrolu, a po količini i svojstvima se razlikuje od komunalnog otpada i svojim karakteristikama je blizak opasnom otpadu.

Postupanje sa otpadom po privrednim načelima i načelima zaštite okolice podrazumijeva: skupljanje, skladištenje, obrađivanje, odlaganje, uvoz, izvoz i transport otpada, zatvaranje i saniranje objekata i prostora namijenjenih odlaganju otpada i drugih otpadom onečišćenih površina.

- Skupljanje otpada je skup organizovanih djelatnosti skupljanja, razvrstavanja i prijevoza.

- Skladištenje otpada je organizovana djelatnost privremenog odlaganja otpada na prostor i objekte predviđene za taj cilj.

- Prerada otpada su djelatnosti iskorištavanja vrijednih svojstava otpada radi korištenja u materijalne, energetske i druge svrhe, smanjivanja količine i volumena otpada i djelimičnog ili potpunog uklanjanja njegovih opasnih svojstava.

- Odlaganje otpada je organizovana djelatnost trajnog odlaganja otpada na posebno za tu namjenu uređene prostore i objekte (odlagališta - deponije).

- Pretovarna deponija je mjesto privremenog skladišta otpada, do njegovog preuzimanja i trajnog deponiranja na posebno za taj cilj uređene prostore i objekte.

- Objekti za skladištenje, preradu ili odlaganje otpada su objekti na određenoj lokaciji koji se sastoje od građevinskog dijela i opreme, što zajedno čini tehničko-tehnološku cjelinu, a namijenjene su skladištenju, obrađivanju ili odlaganju pojedinih vrsta otpada, uz odobrenje nadležnih organa.

- Proizvođač otpada je pravno ili fizičko lice čijom djelatnošću nastaje otpad u svakodnevnom životu i radu, odnosno u proizvodnom procesu u industriji, kao i u institucijama i uslužnim djelatnostima ili, ako to lice nije poznato, lice koje posjeduje, odnosno nadzire otpad.

- Sakupljač otpada je pravno ili fizičko lice koje sakuplja, razvrstava i prevozi otpad.

- Prerađivač otpada je pravno ili fizičko lice koje prerađuje, skladišti ili odlaže otpad.

- Promet otpada je kupovina otpada od proizvođača, sakupljača i prerađivača otpada, radi dalje prodaje zainteresovanim pravnim i fizičkim licima.

#### Član 6.

Otpad se razvrstava zavisno o svojstvima i mjestu nastanka.

Vrste otpada zavisno o svojstvima i mjestu nastanka propisuje Vlada Kantona, na prijedlog Ministarstva urbanizma, prostornog uređenja i zaštite okolice Kantona (u daljem tekstu: Ministarstvo).

Propisom iz stava 2. ovog člana propisuju se vrste otpada ovisno o svojstvima i mjestu nastanka, način postupanja sa pojedinim vrstama otpada, način dostave podataka o postupanju sa otpadom, ispitivanje hemijsko-fizikalnih svojstava opasnih otpada, uzorkovanje otpada, sadržaj obrazaca pratećih prijavnih listova, sadržaj i izgled obrazaca izvještaja o ispitivanju hemijsko-fizikalnih svojstava otpada.

#### Član 7.

Vlada, na prijedlog Ministarstva, donosi dugoročni program (u daljem tekstu: Program) za postupanje sa pojedinim vrstama otpada, koji je sastavni dio Programa zaštite okolice.

Program iz stava 1. ovog člana posebno sadrži:

- ocjenu postojećeg stanja u postupanju sa otpadom;

- osnovne ciljeve i mjere za postupanje sa otpadom;

- način odlaganja samo onog otpada, koji se ne može izbjeći i preraditi;

- obezbjeđenje najpovoljnijih tehničkih i proizvodnih mjera za ostvarenje ciljeva u postupanju sa otpadom;

- izvore i procjene sredstava za sprovođenje programa;

- rokove i odgovornosti za izvršenje utvrđenih mjera.

Program treba da utvrdi i ostale mjere postupanja s otpadom koje su propisane Zakonom o zaštiti okolice, međunarodnim konvencijama i zakonima Federacije Bosne i Hercegovine i Bosne i Hercegovine, te bh. standardima i najnovijim naučnoistraživačkim saznanjima.

## Član 8.

Općinska, odnosno gradska vijeća, u okviru svojih lokalnih planova zaštite i unapređenja životne sredine i prirode, određuju mjere za sprovođenje Programa iz člana 7. ovog Zakona.

## Član 9.

Izvještaj o postupanju sa otpadom, koji sačinjava Ministarstvo, razmatra Skupština Tuzlanskog kantona u okviru izvještaja o stanju okolice.

Izvještaje o postupanju sa otpadom za područje općine i grada, koje sačinjavaju nadležne službe općine, odnosno grada, razmatraju općinska, odnosno gradska vijeća u okviru izvještaja o stanju okolice općine, odnosno grada.

**II. POSTUPANJE SA OTPADOM**

## Član 10.

Osnovni ciljevi postupanja sa otpadom su:

- izbjegavanje i smanjivanje nastajanja otpada i smanjivanje opasnih svojstava otpada čiji se nastanak ne može spriječiti,
- sprječavanje nekontrolisanog postupanja sa otpadom,
- iskorištavanje vrijednih svojstava otpada u materijalne i energetske svrhe i njegova inertizacija prije odlaganja,
- odlaganje otpada na odlagalište (deponije),
- saniranje otpadom onečišćenih površina.

## Član 11.

Sa otpadom se mora postupiti na način da se izbjegne:

- opasnost za ljudsko zdravlje,
- opasnost za biljni i životinjski svijet,
- onečišćavanje okolice: jezera, rijeka, potoka (voda), zemljišta, zraka, iznad propisanih graničnih vrijednosti,
- nekontrolisano odlaganje i spaljivanje,
- nastajanje eksplozije i požara,
- stvaranje buke i neugodnih mirisa,
- pojavljivanje i razmnožavanje štetnih životinja i biljaka, te razvoj patogenih mikroorganizama,
- narušavanje javnog reda i mira.

## Član 12.

U okviru Strategije zaštite okolice, koja se donosi na osnovu zakona, u dijelu u kojem se uređuju pitanja postupanja sa otpadom posebno se obrađuje:

- ocjene postojećeg stanja u postupanju sa otpadom,
- osnovne ciljeve i mjere za postupanje sa otpadom,
- mjere za postupanje sa opasnim otpadom,
- uputstvo za preradu otpada na privrednim načelima i na načelima zaštite okolice,
- način odlaganja samo onog otpada čije se nastajanje ne može izbjeći i koji se ne može preraditi,
- osnovne odredbe za obezbjeđenje najpovoljnijih tehničkih, proizvodnih i ekonomskih mjera za postizanje ciljeva postupanja sa otpadom,
- grafički prikaz razmještaja objekata za skladištenje otpada, obrađivanje i preradu otpada, obuhvate gravitacionih područja, smjerove evakuacije otpada i druge relevantne podatke,
- izvore i procjenu potrebnih sredstava za provođenje ciljeva u postupanju sa otpadom.

## Član 13.

Mjere postupanja sa otpadom utvrđuju se Programom zaštite okolice koji sadrži:

- mjere izbjegavanja i smanjenje nastajanja otpada,
- mjere iskorištavanja vrijednih osobina otpada, odnosno programa odvojenog skupljanja,
- program odvojenog skupljanja opasnog otpada,
- gradnju građevina namijenjenih skladištenju, obrađivanju ili odlaganju otpada,
- mjere saniranja odlagališta otpada i otpadom onečišćenog zemljišta,
- mjere nadzora i praćenja postupanja sa otpadom,
- izvore i visinu finansijskih sredstava za provođenje pojedinih mjera,
- rokove za izvršenje utvrđenih mjera.

## Član 14.

Pravna ili fizička lica koja obavljaju djelatnost postupanja sa otpadom moraju:

- zapošljavati lica koja su osposobljena za obavljanje poslova postupanja sa otpadom,
- udovoljavati propisanim uslovima o tehničko-tehnološkoj opremi prostora, opreme ili objekata za skladištenje, odlaganje ili preradu otpada.

## Član 15.

Pravno ili fizičko lice može početi obavljati djelatnost postupanja sa otpadom nakon što Ministarstvo rješenjem utvrdi da su ispunjeni uslovi iz člana 14. ovog Zakona.

Rješenje iz stava 1. ovog člana je konačno.

**Komunalni otpad**

## Član 16.

Jedinice lokalne samouprave obezbjeđuju provođenje mjera za postupanje sa komunalnim otpadom.

Više jedinica lokalne samouprave mogu sporazumno obezbijediti provođenje mjera za postupanje sa komunalnim otpadom.

## Član 17.

Proizvođač otpada čija se vrijedna svojstva mogu iskoristiti dužan je otpad razvrstati na mjesto nastanka, odvojeno skupljati po vrstama i osigurati uslove skladištenja.

Sakupljači otpada su dužni označiti rezervoare i posude u kojima se otpad skladišti i prijevozi do mjesta obrađivanja ili odlaganja. Oznake se odnose na vrstu otpada i vrstu opasnosti.

**Tehnološki otpad**

## Član 18.

Kanton obezbjeđuje provođenje mjera postupanja sa neopasnim tehnološkim otpadom.

Više kantona mogu sporazumno obezbijediti provođenje mjera postupanja sa neopasnim tehnološkim otpadom.

## Član 19.

Proizvođač tehnološkog neopasnog otpada dužan je na propisan način obraditi, skladištiti i odlagati tehnološki otpad koji nastaje obavljanjem djelatnosti.

## Član 20.

U cilju pospješivanja samoodrživog ekološkog privređivanja proizvođač tehnološkog otpada dužan je kontinuirano izdvajati dio

svog dohotka, a najmanje svakih 5 godina finansirati studijska istraživanja prerade i iskorištenja otpada u skladu sa novim naučnim i tehnološkim saznanjima, sve dok ne osigura bezbjedno odlaganje otpada po okolicu.

Sredstva iz stava 1. proizvođač tehnološkog otpada uplaćivat će na poseban račun namijenjen za zaštitu okolice.

#### Član 21.

Proizvođač tehnološkog otpada dužan je sakupljaču predati prateći list sa podacima o vrsti, mjestu nastanka, količini i načinu pakovanja otpada.

Proizvođač tehnološkog otpada odgovara za tačnost podataka navedenih u pratećem listu.

Sakupljač i prerađivač ne smiju preuzeti otpad bez pratećeg lista.

Sakupljač i prerađivač otpada ne smiju preuzeti otpad koji ne odgovara podacima u pratećem listu.

Po jedan primjerak pratećeg lista prerađivač je dužan dostaviti proizvođaču i Ministarstvu.

Sadržaj i izgled obrasca pratećeg lista propisuje Ministarstvo.

#### **Ambalažni otpad**

#### Član 22.

Ambalažni otpad mora se odvojeno skupljati i posebno obilježavati.

Načine i uslove skupljanja ambalažnog otpada, vrste i oznake za obilježavanje ambalaže, zavisno o vrsti materijala, te načine prerade i odlaganja ambalažnog otpada, propisuje Vlada.

#### **Opasan otpad**

#### Član 23.

Postupanje sa opasnim otpadom vrši se odvojeno od drugih vrsta otpada.

#### Član 24.

Proizvođač opasnog otpada obavezan je obezbijediti skladištenje opasnog otpada.

Tehničko-tehnološke uslove kojima mora udovoljavati prostor, oprema ili objekat za skladištenje opasnog otpada, propisuje Vlada na prijedlog Ministarstva rudarstva, industrije i energetike.

Rezervoar u kojem je opasni otpad označava se sa natpisom "OPASNI OTPAD" i nazivom vrste otpada.

Pakovanje se vrši u kontejnerima posebne konstrukcije zavisno od vida otpada (zapaljiv, eksploziv, infektivan i slično).

#### Član 25.

Pravno ili fizičko lice koje obavlja djelatnost postupanja sa opasnim otpadom mora:

- zapošljavati lica koja imaju propisanu stručnu spremu za obavljanje poslova postupanja sa opasnim otpadom,
- udovoljavati propisanim uslovima o tehničko-tehnološkoj opremljenosti prostora, opreme i objekte za skladištenje, preradu ili odlaganje opasnog otpada,
- imati stručnu spremu za obavljanje poslova postupanja sa opasnim otpadom i tehničko-tehnološke uslove iz stava 1. alineja 2. ovog člana propisuje Vlada.

#### Član 26.

Pravno ili fizičko lice može početi obavljati djelatnost postupanja sa opasnim otpadom nakon što Ministarstvo rješenjem utvrdi da su ispunjeni uslovi u skladu sa važećim propisima.

Protiv rješenja iz stava 1. ovog člana nije dopuštena žalba, ali se može pokrenuti upravni spor.

#### Član 27.

Proizvođač opasnog otpada dužan je svakog mjeseca prijavljivati Ministarstvu podatke o količinama i vrstama opasnog otpada.

Ministarstvo na osnovu podataka iz stava 1. ovog člana vodi katastar o vrstama opasnog otpada i načinu njegovog skladištenja, prerade i odlaganja, koji je sastavni dio katastra zagađenja okolice.

#### Član 28.

Opasni otpad ne smije se prijevoziti sa drugim otpadom.

Sakupljač otpada je dužan dostaviti opasni otpad obrađivaču otpada u stanju u kakvom ga je primio od proizvođača ili vlasnika otpada.

Na prijevoz opasnog otpada primjenjuju se propisi koji vrijede za prijevoz opasnih materija.

#### Član 29.

Proizvođač opasnog otpada dužan je sakupljaču predati prateći list sa podacima o vrsti, mjestu nastanka, količini i načinu pakovanja otpada.

Proizvođač opasnog otpada odgovara za tačnost podataka navedenih u pratećem listu.

Sakupljač ne smije preuzeti opasni otpad bez pratećeg lista.

Obrađivač otpada ne smije preuzeti opasni otpad koji ne odgovara podacima navedenim u pratećem listu.

Po jedan primjerak pratećeg lista obrađivač je dužan dostaviti proizvođaču i Ministarstvu.

#### Član 30.

Proizvođač opasnog otpada dužan je uz prateći list predati sakupljaču opasnog otpada izvještaj o ispitivanju fizikalnih i hemijskih svojstava otpada.

Sakupljač opasnog otpada dužan je uz prateći list predati prerađivaču opasnog otpada izvještaj o ispitivanju fizikalnih i hemijskih svojstava otpada.

Sadržaj i izgled obrasca pratećeg lista i obrasca izvještaja iz člana 21. i stavova 1. i 2. ovog člana propisuje Vlada.

Izradu izvještaja o ispitivanju fizikalnih i hemijskih svojstava otpada Ministarstvo će povjeriti ovlaštenim institucijama.

#### **Poseban otpad**

#### Član 31.

Otpad od naučnoistraživačkih i razvojnih institucija, odnosno biološki i hemijski opasan otpad, institucije su dužne da ga prerade u inertni otpad, što je uslov da se tretira kao otpad.

Otpad iz zdravstvenih institucija stacionarnog tipa (klinike, poliklinike i ambulante), kao i upotrebljena sredstva i sanitetski materijali sa potencijalnim patogenim osobinama, institucije su dužne da ga prerade i oslobode od patoloških uzročnika prije njegovog daljeg postupka u iznošenju i skupljanju otpada.

#### **Vođenje dnevnika kod postupanja sa otpadom**

#### Član 32.

Pravno ili fizičko lice koje proizvodi otpad ili postupa sa otpadom obavezno je voditi dnevnik sa podacima o vrsti, količini,

mjestu nastanka, načinu i mjestu skladištenja, obrađivanja i odlaganja otpada.

Podaci iz stava 1. ovog člana o postupanju sa komunalnim otpadom dostavljaju se tromjesečno općinskoj, odnosno gradskoj službi nadležnoj za poslove zaštite okoline na propisanom obrascu.

Podaci iz stava 1. ovog člana o postupanju sa opasnim otpadom, tehnološkim (neopasnim) i posebnim otpadom dostavljaju se godišnje Ministarstvu na propisanom obrascu.

Općinska, odnosno gradska služba u čijoj su nadležnosti poslovi zaštite okoline dostavljat će podatke iz stava 2. ovog člana Ministarstvu do 31. marta tekuće godine za prethodnu godinu.

Sadržaj i izgled obrazaca iz stavova 2. i 3. ovog člana propisuje Ministarstvo.

#### Član 33.

Ministarstvo na osnovu podataka iz članova 21. i 29. ovog Zakona, vodi Katastar o vrstama otpada i načinu njegovog skladištenja, obrađivanja i odlaganja, što čini sastavni dio Katastra zagađenja okoline.

#### Član 34.

Proizvođač otpada (pravno lice) dužan je Ministarstvu za industriju, rudarstvo i energetiku Kantona tromjesečno prijavljivati podatke o količinama i vrstama otpada koji se mogu iskoristiti u postojećim tehnološkim postrojenjima.

### III. PROSTORI I OBJEKTI ZA SKLADIŠTENJE, PRERADU I ODLAGANJE OTPADA

#### Član 35.

Otpad se skladišti, prerađuje i odlaže samo na prostoru i/ili u objektu predviđenim za tu namjenu.

#### Član 36.

Kriteriji i uslovi za utvrđivanje lokacije za gradnju objekata skladištenja, prerade i odlaganja opasnog otpada se utvrđuju programima za postupanje sa otpadom.

#### Član 37.

Lokacije za skladištenje, preradu i odlaganje otpada utvrđuje se dokumentima prostornog uređenja.

Pri utvrđivanju lokacija uzima se u obzir:

- količine i vrste otpada,
- način skladištenja, prerađivanja ili odlaganja, odnosno vrste objekata namijenjenih skladištenju, preradi ili odlaganja otpada,
- geološke, hidrološke, hidrogeološke, topografske, seizmološke i pedološke karakteristike tla i klimatske karakteristike područja,
- udaljenost od puteva, naselja i vodotoka.

#### Član 38.

Otpad je dopušteno odlagati samo na odobrenom nadzemnom ili podzemnom odlagalištu (deponije) otpada.

Odlagališta otpada razvrstavaju se u kategorije prema vrsti otpada.

Kategorije odlagališta otpada, opće uslove, način rada, zatvaranje i rok saniranja postojećih odlagališta, propisuje Ministarstvo.

Tehnički uslovi gradnje odlagališta utvrđuju se u skladu sa važećim propisom.

### IV. UVOZ, IZVOZ, TRANSPORT I PROMET OTPADA

#### Član 39.

Zabranjuje se uvoz otpada radi odlaganja.

Zabranjuje se uvoz opasnog otpada.

#### Član 40.

Dopušta se uvoz otpada koji se može preraditi bez opasnosti za životnu sredinu i prirodu, osim otpada koji bi se koristio u energetske svrhe.

#### Član 41.

Uvoz otpada dozvoljen je uvozniku ako ispunjava slijedeće uslove:

- da je sklopljen ugovor između izvoznika i uvoznika otpada,
- da je sklopljen ugovor između uvoznika i prerađivača otpada,
- da ima izjavu izvoznika otpada o vrsti, količini, sastavu i porijeklu otpada, o tehnologiji kojom je nastao, te razlozima za njegov izvoz,
- da ima dokaz verifikovane stručne ustanove da prerađivač uvozni otpad može preraditi bez opasnosti po okolicu,
- da priloži izjavu o vrsti otpada koji će nastati preradom uvezenog otpada i o načinu njegova odlaganja,
- da priloži izjavu da se uvezeni otpad neće koristiti u energetske svrhe.

#### Član 42.

Saglasnost za uvoz otpada iz člana 40. ovog Zakona izdaje Ministarstvo.

#### Član 43.

Dopušten je izvoz otpada.

#### Član 44.

Izvoz otpada može se odobriti izvozniku ako ispunjava slijedeće uslove:

- da je izdano odobrenje zemlje uvoznika,
- da ima izjavu izvoznika otpada o vrsti, količini, sastavu i porijeklu otpada, te o razlozima izvoza,
- da je sklopljen ugovor između izvoznika i uvoznika otpada,
- da je izdano odobrenje zemalja kroz koje otpad prolazi na putu do krajnjeg odredišta.

#### Član 45.

Saglasnost za izvoz otpada izdaje Ministarstvo.

#### Član 46.

Vlada je dužna najmanje jednom godišnje prilikom dostavljanja Izvještaja o stanju zaštite okoline informisati Skupštinu Kantona o izdatim odobrenjima iz članova 42. i 45. ovog Zakona.

#### Transport otpada

#### Član 47.

Dopušten je transport otpada područjem Tuzlanskog kantona. Transport otpada odobrava Ministarstvo, ako su ispunjeni uslovi iz članova 40. i 41. ovog Zakona.

**Promet otpada**

## Član 48.

Radi iskorištenja korisnih materija u otpadu u proizvodne, energetske i druge svrhe, dozvoljava se promet otpadom.

## Član 49.

Objekti u kojima se vrši promet otpada moraju da ispunjavaju minimalne tehničke uslove i da raspolazu potrebnom opremom za vršenje te djelatnosti.

Minimalne tehničke uslove iz stava 1. ovog člana, kao i potrebnu opremu za vršenje ove djelatnosti propisuje Ministarstvo.

Rješenje za ispunjavanje uslova za vršenje prometa sa otpadom donosi Ministarstvo.

**V. FINANSIRANJE DJELATNOSTI POSTUPANJA SA OTPADOM****Osiguranje finansijskih sredstava**

## Član 50.

Sredstva za finansiranje izgradnje odlagališta opasnog otpada obezbjeđuju se iz sredstava proizvođača opasnog otpada i iz drugih izvora u skladu sa zakonom.

Sredstva za finansiranje izgradnje odlagališta komunalnog otpada obezbjeđuju se iz budžeta jedinica lokalne samouprave, sakupljača otpada i drugih izvora u skladu sa zakonom.

Sredstva za finansiranje izgradnje odlagališta tehnološkog otpada obezbjeđuje proizvođač tehnološkog otpada i iz drugih izvora u skladu sa zakonom.

Drugi izvori iz stavova 1., 2. i 3. ovog člana su naknade propisane posebnim zakonom, pokloni, krediti, sredstva međunarodne pomoći, sredstva stranih ulaganja namijenjenih postupanju sa otpadom.

**Naknade proizvođača opasnog otpada**

## Član 51.

Pravno ili fizičko lice koje svojom djelatnošću proizvede opasni otpad plaća naknadu u skladu sa odredbama Zakona o zaštiti okolice.

Obveznici, osnovica, visina, odnosno granica do koje se naknada može utvrditi, propisuju se posebnim zakonom.

**Naknada vlasnicima nekretnina**

## Član 52.

Vlasnik nekretnine u čijoj se neposrednoj blizini nalaze prostori i objekti namijenjeni skladištenju, preradi ili odlaganju otpada imaju pravo na naknadu radi umanjene tržišne vrijednosti nekretnine.

Iznos naknade mora biti srazmjeran umanjenoj vrijednosti nekretnine.

Jedinice lokalne samouprave na čijem području se nalaze prostori i objekti namijenjeni skladištenju, preradi ili odlaganju otpada takođe imaju pravo na naknadu.

Naknadu iz stavova 1., 2. i 3. ovog člana isplaćuje investitor. U slučaju spora o iznosu naknade odlučuje nadležni sud.

**VI. NADZOR**

## Član 53.

Nadzor nad primjenom ovog Zakona i propisa donesenih na osnovu ovog Zakona obavlja Ministarstvo.

## Član 54.

Poslove inspekcijskog nadzora nad sprovođenjem ovog Zakona i propisa donesenih na osnovu ovog Zakona sprovode općinski i kantonalni inspektori zaštite okolice.

Na rješenje općinskog inspektora zaštite okolice može se izjaviti žalba Ministarstvu.

Na rješenje kantonalnog inspektora zaštite okolice žalba se izjavljuje ministru Ministarstva.

Žalba na rješenje inspektora zaštite okolice ne odlaže njegovo izvršenje.

## Član 55.

Inspektor zaštite okolice nadzire naročito:

- proizvodnju i postupanje sa otpadom na području Kantona,
- rad pravnih ili fizičkih lica koja obavljaju pojedine djelatnosti proizvodnje i postupanja sa otpadom,
- vođenje zapisnika o postupanju sa otpadom,
- nadzire uvoz, izvoz i transport otpada,
- nadzire prostore i objekte namijenjene skladištenju, obrađivanju i odlaganju tehnološkog i komunalnog otpada.

## Član 56.

Inspektor zaštite okolice u slučajevima povrede ovog Zakona ili propisa donesenih na osnovu njega, ovlašten je rješenjem odrediti mjere iz svog djelokruga, a naročito:

- obavezno uklanjanje otpada sa mjesta koje nije određeno za njegovo odlaganje,
- privremenu obustavu rada, odnosno zabranu skladištenja, prerade ili odlaganja otpada, ako pravno ili fizičko lice ne ispunjava propisane uslove za takvu djelatnost,
- zabranu skladištenja, prerade ili odlaganja otpada ako se ne provodi na propisan način,
- zabranu upotrebe prostora i objekata namijenjenih skladištenju, preradi ili odlaganju otpada, ako ne ispunjavaju propisane uslove.

## Član 57.

Utvrđi li da je povrijeđen ovaj Zakon ili propis donesen na osnovu ovog Zakona, inspektor zaštite okolice dužan je:

- podnijeti bez odlaganja zahtjev za pokretanje postupka nadležnom organu,
- predložiti ministru da kod nadležnog suda pokrene postupak za brisanje iz sudskog registra one djelatnosti za koju se utvrdi da za nju, pravno ili fizičko lice, ne ispunjava uslove propisane ovim Zakonom,
- poduzeti druge mjere za koje je ovlašten.

## Član 58.

Inspektor zaštite okolice može donijeti usmenu odluku u slučaju kada je neophodno otkloniti neposrednu opasnost za život i zdravlje ljudi, životinjski i biljni svijet.

Pismeno rješenje usmene odluke mora se dostaviti stranci u roku od 3 dana od dana donošenja usmene odluke.

Žalba na rješenje inspektora zaštite okolice iz stava 1. ovog člana ne zadržava izvršenje rješenja.

## Član 59.

Lice koje baca ili odlaže otpad na mjestu koje nije predviđeno za njegovo odlaganje, građani su dužni prijaviti nadležnom organu - inspektoratu zaštite okoline.

Nadležni inspektor će na osnovu prijave pokrenuti prekršajni postupak i naložiti uklanjanje otpadnog materijala na teret lica iz stava 1. ovog člana.

Kada otpad odlaže nepoznato lice na nekretnini koja nije određena kao mjesto za njegovo odlaganje inspektor zaštite okoline rješenjem će odrediti uklanjanje otpada u određenom roku:

- na trošak vlasnika nekretnine, ako je to pravno lice,
- na trošak jedinica lokalne samouprave, ako je vlasnik nekretnine fizičko lice ili je nekretnina napuštena od njenog vlasnika.

Jedinica lokalne samouprave (općina), odnosno pravno lice koje je podmirila trošak uklanjanja otpada iz stava 3., alineje 1. i 2. ovog člana zadržava pravo povratka podmirenog troška od lica za koje bi se utvrdilo da je izvršilo nedozvoljeno odlaganje otpada.

**VII. KAZNE NE ODREDBE**

## Član 60.

Novčanom kaznom u iznosu od 2.000,00 do 4.000,00 KM kaznit će se za prekršaj pravno lice:

1. ako proizvođač tehnološkog otpada ne preda sakupljaču prateći list (Član 21. stav 1.);
2. ako proizvođač navede netačne podatke u pratećem listu (Član 21. stav 2.);
3. ako sakupljač i prerađivač preuzmu otpad bez pratećeg lista (Član 21. stav 3.);
4. ako sakupljač i prerađivač otpada preuzmu otpad koji ne odgovara podacima u pratećem listu (Član 21. stav 4.);
5. ako prerađivač ne dostavi primjerak pratećeg lista proizvođaču i Ministarstvu (Član 21. stav 5.);
6. ako ne označi rezervoar sa opasnim otpadom (Član 24. stav 3.);
7. ako pravno lice ne vodi dnevnik sa podacima o vrsti, količini, mjestu nastanka, načinu i mjestu prerade i odlaganja otpada (Član 32. stav 1.);
8. ako pravno lice koje postupa sa komunalnim otpadom ne dostavi podatke općinskom, gradskom ili kantonalnom organu nadležnom za poslove zaštite okoline (Član 32. stav 2.);
9. ako pravno ili fizičko lice koje postupa sa tehnološkim otpadom ne dostavi podatke Ministarstvu (Član 32. stav 3.);
10. ako proizvođač otpada ne prijavi podatke o vrstama otpada Ministarstvu industrije, energetike i rudarstva Kantona (Član 34.).

Za radnje iz stava 1. ovog člana kaznit će se za prekršaj i odgovorno lice u pravnom licu novčanom kaznom u iznosu od 500,00 do 1.500,00 KM.

Novčanom kaznom u iznosu od 200,00 do 800,00 KM kaznit će se fizičko lice koje odlaže ili baca otpad na prostoru koji nije predviđen za njegovo odlaganje (Član 59. stav 1.).

## Član 61.

Novčanom kaznom u iznosu od 5.000,00 do 10.000,00 KM kaznit će se za prekršaj pravno lice:

1. ako odvojeno ne sakuplja i ne skladišti otpad čija se vrijedna svojstva mogu iskoristiti (Član 17. stav 1.);
2. ako sakupljač otpada ne označi rezervoare i posude u kojima se otpad skladišti (Član 17. stav 2.);
3. ako proizvođač tehnološkog otpada ne izdvaja dio svog dohotka (Član 20. stav 1.);

4. ako pravno lice ne zapošljava radnike sa određenom stručnom spremom (Član 25. alineja 1.);

5. ako proizvođač opasnog otpada ne obezbijedi njegovo skladištenje (Član 24. stav 1.);

6. ako započne obavljanje djelatnosti bez rješenja Ministarstva (Član 26. stav 1.);

7. ako prijevozi opasni otpad sa drugim otpadom (Član 28. stav 1.);

8. ako sakupljač ne dostavi prerađivaču opasni otpad u stanju u kakvom ga je primio (Član 28. stav 2.);

9. ako proizvođač opasnog otpada ne preda sakupljaču prateći list (Član 29. stav 1.);

10. ako proizvođač opasnog otpada navede netačne podatke u pratećem listu (Član 29. stav 2.);

11. ako sakupljač preuzme opasni otpad bez pratećeg lista (Član 29. stav 3.);

12. ako prerađivač opasnog otpada preuzme opasni otpad koji ne odgovara podacima u pratećem listu (Član 29. stav 4.);

13. ako prerađivač opasnog otpada ne dostavi primjerak pratećeg lista proizvođaču i Ministarstvu (Član 29. stav 5.);

14. ako proizvođač ne preda sakupljaču opasnog otpada izvještaje o ispitivanju fizikalnih i hemijskih svojstava otpada (Član 30. stav 1.);

15. ako sakupljač ne preda prerađivaču opasnog otpada izvještaje o ispitivanju fizikalnih i hemijskih svojstava otpada (Član 30. stav 2.);

16. ako bez saglasnosti Ministarstva izvozi otpad (Član 45.);

17. ako bez saglasnosti Ministarstva transportuje otpad područjem Kantona (Član 47. stav 2.);

18. ako ne postupi po rješenju inspektora (Član 56.).  
Za radnje iz stava 1. ovog člana kaznit će se za prekršaj i odgovorno lice u pravnom licu novčanom kaznom u iznosu od 500,00 do 2.000,00 KM.

## Član 62.

Novčanom kaznom u iznosu od 2.000,00 do 8.000,00 KM kaznit će se za prekršaj pravno lice:

1. ako započne obavljanje djelatnosti bez rješenja Ministarstva (Član 15. stav 1.);
2. ako proizvođač ne preradi i ne obezbijedi skladištenje tehnološkog otpada koji je nastao obavljanjem djelatnosti (Član 19.);
3. ako prostor, oprema i građevina ne zadovoljavaju propisane tehničko-tehnološke uslove (Član 24. stav 2.);
4. ako odvojeno ne sakuplja ili ne označava ambalažni otpad (Član 22. stav 1.);
5. ako otpad ne odlaže na deponije otpada (Član 35.).

## Član 63.

Novčanom kaznom u iznosu od 10.000,00 do 20.000,00 KM kaznit će se za prekršaj pravno lice:

1. ako uvozi otpad radi odlaganja (Član 39. stav 1.);
  2. ako uvozi opasni otpad (Član 39. stav 2.);
  3. ako bez saglasnosti Ministarstva uvozi otpad (Član 42. stav 1.).
- Za prekršaj iz stava 1. tačke 2. može se izreći mjera zabrane rada pravnom licu koje uvozi opasni otpad.

Za radnje iz stava 1. ovog člana kaznit će se za prekršaj i odgovorno lice u pravnom licu novčanom kaznom u iznosu od 1.000,00 do 2.000,00 KM.

**VIII. PRIJELAZNE I ZAVRŠNE ODREDBE**

## Član 64.

Jedinice lokalne samouprave i uprave na čijem području se nalaze odlagališta, deponije dužne su za ista obezbijediti svu

potrebnu dokumentaciju za rad deponije u roku od najdalje dvije godine od dana stupanja na snagu ovog Zakona.

#### Član 65.

Pravna i fizička lica koja obavljaju djelatnost postupanja sa otpadom koje ne pribave saglasnost iz člana 15. stav 1. ovog Zakona u roku od godinu dana od dana stupanja na snagu ovog Zakona prestaju obavljati djelatnost postupanja sa otpadom.

Pravna i fizička lica koja obavljaju djelatnost postupanja sa opasnim otpadom koja ne pribave rješenje iz člana 26. stav 1. ovoga Zakona u roku od godinu dana od dana stupanja na snagu ovog Zakona prestaju obavljati djelatnost postupanja sa opasnim otpadom.

#### Član 66.

Propisi za provođenje ovog Zakona čije je donošenje propisano u članovima 6., 21., 22. i 30. ovog Zakona donijet će se u roku od 3 mjeseca od dana stupanja na snagu ovog Zakona

Propisi za provođenje ovog Zakona čije je donošenje propisano članovima 14., 24., 25. i 38. ovog Zakona donijet će se u roku od 6 mjeseci dana od dana stupanja na snagu ovog Zakona.

Propisima iz stavova 1. i 2. ovog člana mogu se propisati prekršaji i odrediti novčane kazne za te prekršaje.

#### Član 67.

Stupanjem na snagu federalnog zakona kojim se reguliše oblast sabiranja, transporta, prerade i deponovanja otpada, nastaje obaveza da se ovaj Zakon uskladi sa odredbama federalnog zakona.

#### Član 68.

Ovaj Zakon stupa na snagu osmog dana od dana objavljivanja u "Službenim novinama Tuzlanskog kantona".

Bosna i Hercegovina  
Federacija Bosne i Hercegovine  
TUZLANSKI KANTON  
Skupština  
Broj: 01-011-197-14/00  
Tuzla, 2. 11. 2000. godine

Predsjednik  
Skupštine Tuzlanskog kantona  
**Dr. Izet Žigić, v.r.**

590

Na temelju poglavlja IV, odjeljak B, članka 33. stavak 1. točka e) Ustava Tuzlanskog kantona, donosim

## UKAZ

### O PROGLAŠENJU ZAKONA O OTPADU

Progllašava se Zakon o otpadu, koji je donio Sabor Tuzlanskog kantona na sjednici od 2. 11. 2000. godine.

Broj: 01/1-02-1792/00  
Tuzla, 8. 11. 2000. g.

Predsjednik  
Tuzlanskog kantona  
**Dr. Tarik Arapčić, v.r.**

## ZAKON

### O OTPADU

#### I. OPĆE ODREDBE

##### Članak 1.

Ovim Zakonom se uređuju prava, obveze i odgovornosti pravnih i fizičkih osoba koje proizvode i postupaju s otpadom na području Tuzlanskog kantona (u daljem tekstu: Kanton).

Odredbe ovog Zakona uređuju način i uvjete sabiranja, transporta, prerade i deponovanja otpada na uređenim deponijama, održavanje deponija, kao i vršenje prometa otpada.

Način postupanja sa radioaktivnim otpadom i s otpadnim materijama i predmetima koji se ispuštaju u površinske vode, kanalizacionu mrežu i zrak, kao i predmetima koji su korišteni sa izvorima jonizirajućeg zračenja, uređuju se posebnim propisima.

##### Članak 2.

U postupanju s otpadom poštivat će se propisi o zaštiti okoliše i propisi međunarodnog prava koji reguliraju oblast zaštite okoliše.

##### Članak 3.

Otpad su, po ovom Zakonu, materije i predmeti, koje je pravna ili fizička osoba odbacila ili odložila, namjerava ih ili mora odložiti.

##### Članak 4.

U smislu ovog Zakona, ne smatra se otpadom plodno i potencijalno plodno poljoprivredno zemljište koje će korisnik, odnosno investitor skinuti i sačuvati u momentu promjene namjene poljoprivrednog zemljišta.

##### Članak 5.

Pojmovi koji se koriste u ovom Zakonu imaju slijedeće značenje:

Otpad po mjestu nastanka:

- komunalni otpad je otpad iz kućanstva, otpad koji nastaje čišćenjem javnih površina i otpad koji nastaje u gospodarskim i uslužnim djelatnostima a isti je vrlo sličan otpadu iz kućanstva i otpadu koji nastaje čišćenjem javnih površina,

- tehnološki otpad je otpad koji nastaje u proizvodnim procesima u gospodarskim i uslužnim djelatnostima, a po količinama, sastavu i svojstvu razlikuje se od komunalnog otpada;

Otpad po svojstvima:

- opasni otpad je utvrđen Konvencijom o nadzoru prekograničnog prometa opasnog otpada i njegovom odlaganju (Bazel, 22.3.1989. godine). Opasni otpad sadrži materije koje imaju jedno od ovih svojstava: eksplozivnost, reaktivnost, zapaljivost, nagrizanje, nadražljivost, štetnost, toksičnost, infektivnost, kancerogenost, mutagenost, ekotoksičnost i svojstvo otpuštanja otrovnih plinova kemijskom reakcijom ili biološkom razgradnjom.

Komunalni i tehnološki otpad svrstavaju se u opasni otpad ako sadrže materije koje imaju jedno od pomenutih svojstava.

Ostali pojmovi:

- inertni otpad je otpad koji uopće ne sadrži ili sadrži malo materija koje podliježu fizikalnoj, hemijskoj i biološkoj razgradnji, pa ne ugrožava okolicu.

- ambalažni otpad je ambalaža koja ostane nakon što se proizvod otpakira.

- poseban otpad je otpad koji nastaje u medicinsko-zdravstvenim institucijama (stacionari, ambulante, poliklinike i

bolnice), znanstvenoistraživačkim i razvojnim institucijama (instituti), laboratorijima (istraživački, razvojni i kontrolni), kao produkt uporabe sredstava i materijala za liječenje, istraživanje i kontrolu, a po količini i svojstvima se razlikuje od komunalnog otpada i svojim karakteristikama je blizak opasnom otpadu.

- Postupanje s otpadom po gospodarskim načelima i načelima zaštite okoline podrazumjeva: skupljanje, skladištenje, obrađivanje, odlaganje, uvoz, izvoz i transport otpada, zatvaranje i saniranje objekata i prostora namijenjenih odlaganju otpada i drugih otpadom onečišćenih površina.

- Skupljanje otpada je skup organiziranih djelatnosti skupljanja, razvrstavanja i prijevoza.

- Skladištenje otpada je organizirana djelatnost privremenog odlaganja otpada na prostor i objekte predviđene za taj cilj.

- Prerada otpada su djelatnosti iskorištavanja vrijednih svojstava otpada radi korištenja u materijalne, energetske i druge svrhe, smanjivanja količine i volumena otpada i djelimičnog ili potpunog uklanjanja njegovih opasnih svojstava.

- Odlaganje otpada je organizirana djelatnost trajnog odlaganja otpada na posebno za tu namjenu uređene prostore i objekte (odlagališta - deponije).

- Pretovarna deponija je mjesto privremenog skladišta otpada, do njegovog preuzimanja i trajnog deponiranja na posebno za taj cilj uređene prostore i objekte.

- Objekti za skladištenje, preradu ili odlaganje otpada su objekti na određenoj lokaciji koji se sastoje od građevinskog dijela i opreme, što zajedno čini tehničko-tehnološku cjelinu, a namijenjene su skladištenju, obrađivanju ili odlaganju pojedinih vrsta otpada, uz odobrenje nadležnih organa.

- Proizvođač otpada je pravna ili fizička osoba čijom djelatnošću nastaje otpad u svakodnevnom životu i radu, odnosno u proizvodnom procesu u industriji, kao i u institucijama i uslužnim djelatnostima ili, ako ta osoba nije poznata, osoba koja posjeduje, odnosno nadzire otpad.

- Sakupljač otpada je pravna ili fizička osoba koja sakuplja, razvrstava i prevozi otpad.

- Prerađivač otpada je pravna ili fizička osoba koja prerađuje, skladišti ili odlaže otpad.

- Promet otpada je kupovina otpada od proizvođača, sakupljača i prerađivača otpada, radi dalje prodaje zainteresiranim pravnim i fizičkim osobama.

#### Članak 6.

Otpad se razvrstava ovisno o svojstvima i mjestu nastanka.

Vrste otpada ovisno o svojstvima i mjestu nastanka propisuje Vlada Kantona, na prijedlog Ministarstva urbanizma, prostornog uređenja i zaštite okoline Kantona (u daljem tekstu: Ministarstvo).

Propisom iz stavka 2. ovog članka propisuju se vrste otpada ovisno o svojstvima i mjestu nastanka, način postupanja sa pojedinim vrstama otpada, način dostave podataka o postupanju s otpadom, ispitivanje kemijsko-fizikalnih svojstava opasnih otpada, uzorkovanje otpada, sadržaj obrazaca pratećih prijavnih listova, sadržaj i izgled obrazaca izvješća o ispitivanju kemijsko-fizikalnih svojstava otpada.

#### Članak 7.

Vlada, na prijedlog Ministarstva, donosi dugoročni program (u daljem tekstu: Program) za postupanje sa pojedinim vrstama otpada, koji je sastavni dio Programa zaštite okoline.

Program iz stavka 1. ovog članka posebno sadrži:

- ocjenu postojećeg stanja u postupanju s otpadom;

- osnovne ciljeve i mjere za postupanje s otpadom;

- način odlaganja samo onog otpada, koji se ne može izbjeći i preraditi;

- osiguranje najpovoljnijih tehničkih i proizvodnih mjera za ostvarenje ciljeva u postupanju s otpadom;

- izvore i procjene sredstava za sprovođenje programa;

- rokove i odgovornosti za izvršenje utvrđenih mjera.

Program treba da utvrdi i ostale mjere postupanja s otpadom koje su propisane Zakonom o zaštiti okoline, međunarodnim konvencijama i zakonima Federacije Bosne i Hercegovine i Bosne i Hercegovine, te bh. standardima i najnovijim znanstvenoistraživačkim saznanjima.

#### Članak 8.

Općinska, odnosno gradska vijeća, u okviru svojih lokalnih planova zaštite i unapređenja životne sredine i prirode, određuju mjere za sprovođenje Programa iz članka 7. ovog Zakona.

#### Članak 9.

Izvješće o postupanju s otpadom, koji sačinjava Ministarstvo, razmatra Sabor Tuzlanskog kantona u okviru izvješća o stanju okoline.

Izvješća o postupanju s otpadom za područje općine i grada, koje sačinjavaju nadležne službe općine, odnosno grada, razmatraju općinska, odnosno gradska vijeća u okviru izvješća o stanju okoline općine, odnosno grada.

## II. POSTUPANJE S OTPADOM

#### Članak 10.

Osnovni ciljevi postupanja s otpadom su:

- izbjegavanje i smanjivanje nastajanja otpada i smanjivanje opasnih svojstava otpada čiji se nastanak ne može spriječiti,
- sprječavanje nekontroliranog postupanja s otpadom,
- iskorištavanje vrijednih svojstava otpada u materijalne i energetske svrhe i njegova inertizacija prije odlaganja,
- odlaganje otpada na odlagalište (deponije),
- saniranje otpadom onečišćenih površina.

#### Članak 11.

S otpadom se mora postupiti na način da se izbjegne:

- opasnost za ljudsko zdravlje,
- opasnost za biljni i životinjski svijet,
- onečišćavanje okoline: jezera, rijeka, potoka (voda), zemljišta, zraka, iznad propisanih graničnih vrijednosti,
- nekontrolirano odlaganje i spaljivanje,
- nastajanje eksplozije i požara,
- stvaranje buke i neugodnih mirisa,
- pojavljivanje i razmnožavanje štetnih životinja i biljaka, te razvoj patogenih mikroorganizama,
- narušavanje javnog reda i mira.

#### Članak 12.

U okviru Strategije zaštite okoline, koja se donosi na temelju zakona, u dijelu u kojem se uređuju pitanja postupanja s otpadom posebno se obrađuje:

- ocjene postojećeg stanja u postupanju s otpadom,

- osnovne ciljeve i mjere za postupanje s otpadom,

- mjere za postupanje s opasnim otpadom,

- uputstvo za preradu otpada na gospodarskim načelima i na načelima zaštite okoline,

- način odlaganja samo onog otpada čije se nastajanje ne može izbjeći i koji se ne može preraditi,

- temeljne odredbe za osiguranje najpovoljnijih tehničkih, proizvodnih i ekonomskih mjera za postizanje ciljeva postupanja s otpadom,

- grafički prikaz razmještaja objekata za skladištenje otpada, obrađivanje i preradu otpada, obuhvate gravitacionih područja, smjerove evakuacije otpada i druge relevantne podatke,

- izvore i procjenu potrebnih sredstava za provođenje ciljeva u postupanju s otpadom.

#### Članak 13.

Mjere postupanja s otpadom utvrđuju se Programom zaštite okolice koji sadrži:

- mjere izbjegavanja i smanjenje nastajanja otpada,
- mjere iskorištavanja vrijednih osobina otpada, odnosno programa odvojenog skupljanja,
- program odvojenog skupljanja opasnog otpada,
- gradnju građevina namijenjenih skladištenju, obrađivanju ili odlaganju otpada,
- mjere saniranja odlagališta otpada i otpadom onečišćenog zemljišta,
- mjere nadzora i praćenja postupanja s otpadom,
- izvore i visinu finansijskih sredstava za provođenje pojedinih mjera,
- rokove za izvršenje utvrđenih mjera.

#### Članak 14.

Pravne ili fizičke osobe koje obavljaju djelatnost postupanja s otpadom moraju:

- zapošljavati osobe koje su osposobljene za obavljanje poslova postupanja s otpadom,
- udovoljavati propisanim uvjetima o tehničko-tehnološkoj opremi prostora, opreme ili objekata za skladištenje, odlaganje ili preradu otpada.

#### Članak 15.

Pravna ili fizička osoba može početi obavljati djelatnost postupanja s otpadom nakon što Ministarstvo rješenjem utvrdi da su ispunjeni uvjeti iz članka 14. ovog Zakona.

Rješenje iz stavka 1. ovog članka je konačno.

#### **Komunalni otpad**

#### Članak 16.

Jedinice lokalne samouprave osiguravaju provođenje mjera za postupanje s komunalnim otpadom.

Više jedinica lokalne samouprave mogu sporazumno osigurati provođenje mjera za postupanje s komunalnim otpadom.

#### Članak 17.

Proizvođač otpada čija se vrijedna svojstva mogu iskoristiti dužan je otpad razvrstati na mjesto nastanka, odvojeno skupljati po vrstama i osigurati uvjete skladištenja.

Sakupljači otpada su dužni označiti spremnike i posude u kojima se otpad skladišti i prijevozi do mjesta obrađivanja ili odlaganja. Oznake se odnose na vrstu otpada i vrstu opasnosti.

#### **Tehnološki otpad**

#### Članak 18.

Kanton osigurava provođenje mjera postupanja s neopasnim tehnološkim otpadom.

Više kantona mogu sporazumno osigurati provođenje mjera postupanja sa neopasnih tehnološkim otpadom.

#### Članak 19.

Proizvođač tehnološkog neopasnog otpada dužan je na propisan način obraditi, skladištiti i odlagati tehnološki otpad koji nastaje obavljanjem djelatnosti.

#### Članak 20.

U cilju pospješivanja samoodrživog ekološkog privređivanja proizvođač tehnološkog otpada dužan je kontinuirano izdvajati dio svog dohotka, a najmanje svakih 5 godina financirati studijska istraživanja prerade i iskorištenja otpada sukladno novim znanstvenim i tehnološkim saznanjima, sve dok ne osigura sigurno odlaganje otpada po okolicu.

Sredstva iz stavka 1. proizvođač tehnološkog otpada uplaćivat će na poseban račun namijenjen za zaštitu okolice.

#### Članak 21.

Proizvođač tehnološkog otpada dužan je sakupljaču predati prateći list s podacima o vrsti, mjestu nastanka, količini i načinu pakovanja otpada.

Proizvođač tehnološkog otpada odgovara za točnost podataka navedenih u pratećem listu.

Sakupljač i prerađivač ne smiju preuzeti otpad bez pratećeg lista.

Sakupljač i prerađivač otpada ne smiju preuzeti otpad koji ne odgovara podacima u pratećem listu.

Po jedan primjerak pratećeg lista prerađivač je dužan dostaviti proizvođaču i Ministarstvu.

Sadržaj i izgled obrasca pratećeg lista propisuje Ministarstvo.

#### **Ambalažni otpad**

#### Članak 22.

Ambalažni otpad mora se odvojeno skupljati i posebno obilježavati.

Načine i uvjete skupljanja ambalažnog otpada, vrste i oznake za obilježavanje ambalaže, ovisno o vrsti materijala, te načine prerade i odlaganja ambalažnog otpada, propisuje Vlada.

#### **Opasan otpad**

#### Članak 23.

Postupanje sa opasnim otpadom vrši se odvojeno od drugih vrsta otpada.

#### Članak 24.

Proizvođač opasnog otpada obavezan je osigurati skladištenje opasnog otpada.

Tehničko-tehnološke uvjete kojima mora udovoljavati prostor, oprema ili objekat za skladištenje opasnog otpada, propisuje Vlada na prijedlog Ministarstva rudarstva, industrije i energetike.

Spremnik u kojem je opasni otpad označava se sa natpisom "OPASNI OTPAD" i nazivom vrste otpada.

Pakovanje se vrši u kontejnerima posebne konstrukcije ovisno od vida otpada (zapaljiv, eksploziv, infektivan i slično).

#### Članak 25.

Pravna ili fizička osoba koja obavlja djelatnost postupanja s opasnim otpadom mora:

- zapošljavati osobe koje imaju propisanu stručnu spremu za obavljanje poslova postupanja s opasnim otpadom,
- udovoljavati propisanim uvjetima o tehničko-tehnološkoj opremljenosti prostora, opreme i objekte za skladištenje, preradu ili odlaganje opasnog otpada,
- imati stručnu spremu za obavljanje poslova postupanja s opasnim otpadom i tehničko-tehnološke uvjete iz stavka 1. alineja 2. ovog članka propisuje Vlada.

#### Članak 26.

Pravna ili fizička osoba može početi obavljati djelatnost postupanja s opasnim otpadom nakon što Ministarstvo rješenjem utvrdi da su ispunjeni uvjeti sukladno važećim propisima.

Protiv rješenja iz stavka 1. ovog članka nije dopuštena žalba, ali se može pokrenuti upravni spor.

#### Članak 27.

Proizvođač opasnog otpada dužan je svakog mjeseca prijavljivati Ministarstvu podatke o količinama i vrstama opasnog otpada.

Ministarstvo na temelju podataka iz stavka 1. ovog članka vodi katastar o vrstama opasnog otpada i načinu njegovog skladištenja, prerade i odlaganja, koji je sastavni dio katastra zagađenja okolice.

#### Članak 28.

Opasni otpad ne smije se prijevoziti s drugim otpadom.

Sakupljač otpada je dužan dostaviti opasni otpad obrađivaču otpada u stanju u kakvom ga je primio od proizvođača ili vlasnika otpada.

Na prijevoz opasnog otpada primjenjuju se propisi koji vrijede za prijevoz opasnih materija.

#### Članak 29.

Proizvođač opasnog otpada dužan je sakupljaču predati prateći list s podacima o vrsti, mjestu nastanka, količini i načinu pakovanja otpada.

Proizvođač opasnog otpada odgovara za točnost podataka navedenih u pratećem listu.

Sakupljač ne smije preuzeti opasni otpad bez pratećeg lista. Obradaivač otpada ne smije preuzeti opasni otpad koji ne odgovara podacima navedenim u pratećem listu.

Po jedan primjerak pratećeg lista obrađivač je dužan dostaviti proizvođaču i Ministarstvu.

#### Članak 30.

Proizvođač opasnog otpada dužan je uz prateći list predati sakupljaču opasnog otpada izvješće o ispitivanju fizikalnih i kemijskih svojstava otpada.

Sakupljač opasnog otpada dužan je uz prateći list predati preradaivaču opasnog otpada izvješće o ispitivanju fizikalnih i kemijskih svojstava otpada.

Sadržaj i izgled obrasca pratećeg lista i obrasca izvješća iz članka 21. i stavaka 1. i 2. ovog članka propisuje Vlada.

Izradu izvješća o ispitivanju fizikalnih i kemijskih svojstava otpada Ministarstvo će povjeriti ovlaštenim institucijama.

#### **Poseban otpad**

#### Članak 31.

Otpad od znanstvenoistraživačkih i razvojnih institucija, odnosno biološki i kemijski opasan otpad, institucije su dužne da ga prerade u inertni otpad, što je uvjet da se tretira kao otpad.

Otpad iz zdravstvenih institucija stacionarnog tipa (klinike, poliklinike i ambulante), kao i uporabljena sredstva i sanitetski materijali s potencijalnim patogenim osobinama, institucije su dužne da ga prerade i oslobode od patoloških uzročnika prije njegovog daljeg postupka u iznošenju i skupljanju otpada.

#### **Vođenje dnevnika kod postupanja s otpadom**

#### Članak 32.

Pravna ili fizička osoba koja proizvodi otpad ili postupa s otpadom obvezna je voditi dnevnik s podacima o vrsti, količini, mjestu nastanka, načinu i mjestu skladištenja, obrađivanja i odlaganja otpada.

Podaci iz stavka 1. ovog članka o postupanju s komunalnim otpadom dostavljaju se tromjesečno općinskoj, odnosno gradskoj službi nadležnoj za poslove zaštite okolice na propisanom obrascu.

Podaci iz stavka 1. ovog članka o postupanju s opasnim otpadom, tehnološkim (neopasnim) i posebnim otpadom dostavljaju se godišnje Ministarstvu na propisanom obrascu.

Općinska, odnosno gradska služba u čijoj su nadležnosti poslovi zaštite okolice dostavljat će podatke iz stavka 2. ovog članka Ministarstvu do 31. ožujka tekuće godine za prethodnu godinu.

Sadržaj i izgled obrazaca iz stavka 2. i 3. ovog članka propisuje Ministarstvo.

#### Članak 33.

Ministarstvo na temelju podataka iz članka 21. i 29. ovog Zakona, vodi Katastar o vrstama otpada i načinu njegovog skladištenja, obrađivanja i odlaganja, što čini sastavni dio Katastra zagađenja okolice.

#### Članak 34.

Proizvođač otpada (pravna osoba) dužan je Ministarstvu za industriju, rudarstvo i energetiku Kantona tromjesečno prijavljivati podatke o količinama i vrstama otpada koji se mogu iskoristiti u postojećim tehnološkim postrojenjima.

### **III. PROSTORI I OBJEKTI ZA SKLADIŠTENJE, PRERADU I ODLAGANJE OTPADA**

#### Članak 35.

Otpad se skladišti, preraduje i odlaže samo na prostoru i/ili u objektu predviđenim za tu namjenu.

#### Članak 36.

Kriteriji i uvjeti za utvrđivanje lokacije za gradnju objekata skladištenja, prerade i odlaganja opasnog otpada se utvrđuju programima za postupanje s otpadom.

#### Članak 37.

Lokacije za skladištenje, preradu i odlaganje otpada utvrđuje se dokumentima prostornog uređenja.

Pri utvrđivanju lokacija uzima se u obzir:

- količine i vrste otpada,
- način skladištenja, prerađivanja ili odlaganja, odnosno vrste objekata namijenjenih skladištenju, preradi ili odlaganja otpada,
- geološke, hidrološke, hidrogeološke, topografske, seizmološke i pedološke karakteristike tla i klimatske karakteristike područja,
- udaljenost od putova, naselja i vodotoka.

## Članak 38.

Otpad je dopušteno odlagati samo na odobrenom nadzemnom ili podzemnom odlagalištu (deponije) otpada.

Odlagališta otpada razvrstavaju se u kategorije prema vrsti otpada.

Kategorije odlagališta otpada, opće uvjete, način rada, zatvaranje i rok saniranja postojećih odlagališta, propisuje Ministarstvo.

Tehnički uvjeti gradnje odlagališta utvrđuju se sukladno važećim propisom.

**IV. UVOZ, IZVOZ, TRANSPORT I PROMET OTPADA**

## Članak 39.

Zabranjuje se uvoz otpada radi odlaganja.

Zabranjuje se uvoz opasnog otpada.

## Članak 40.

Dopušta se uvoz otpada koji se može preraditi bez opasnosti za životnu sredinu i prirodu, osim otpada koji bi se koristio u energetske svrhe.

## Članak 41.

Uvoz otpada dozvoljen je uvozniku ako ispunjava slijedeće uvjete:

- da je sklopljen ugovor između izvoznika i uvoznika otpada,
- da je sklopljen ugovor između uvoznika i prerađivača otpada,
- da ima izjavu izvoznika otpada o vrsti, količini, sastavu i porijeklu otpada, o tehnologiji kojom je nastao, te razlozima za njegov izvoz,
- da ima dokaz verificirane stručne ustanove da prerađivač uvozni otpad može preraditi bez opasnosti po okolicu,
- da priloži izjavu o vrsti otpada koji će nastati preradom uvezenog otpada i o načinu njegova odlaganja,
- da priloži izjavu da se uvezeni otpad neće koristiti u energetske svrhe.

## Članak 42.

Suglasnost za uvoz otpada iz članka 40. ovog Zakona izdaje Ministarstvo.

## Članak 43.

Dopušten je izvoz otpada.

## Članak 44.

Izvoz otpada može se odobriti izvozniku ako ispunjava slijedeće uvjete:

- da je izdano odobrenje zemlje uvoznika,
- da ima izjavu izvoznika otpada o vrsti, količini, sastavu i porijeklu otpada, te o razlozima izvoza,
- da je sklopljen ugovor između izvoznika i uvoznika otpada,
- da je izdano odobrenje zemalja kroz koje otpad prolazi na putu do krajnjeg odredišta.

## Članak 45.

Suglasnost za izvoz otpada izdaje Ministarstvo.

## Članak 46.

Vlada je dužna najmanje jednom godišnje prilikom dostavljanja Izvješća o stanju zaštite okoline informirati Sabor Kantona o izdatim odobrenjima iz članaka 42. i 45. ovog Zakona.

**Transport otpada**

## Članak 47.

Dopušten je transport otpada područjem Tuzlanskog kantona. Transport otpada odobrava Ministarstvo, ako su ispunjeni uvjeti iz članaka 40. i 41. ovog Zakona.

**Promet otpada**

## Članak 48.

Radi iskorištenja korisnih materija u otpadu u proizvodne, energetske i druge svrhe, dozvoljava se promet otpadom.

## Članak 49.

Objekti u kojima se vrši promet otpada moraju da ispunjavaju minimalne tehničke uvjete i da raspolažu potrebnom opremom za vršenje te djelatnosti.

Minimalne tehničke uvjete iz stavka 1. ovog članka, kao i potrebnu opremu za vršenje ove djelatnosti propisuje Ministarstvo.

Rješenje za ispunjavanje uvjeta za vršenje prometa s otpadom donosi Ministarstvo.

**V. FINANCIRANJE DJELATNOSTI POSTUPANJA SA OTPADOM****Osiguranje finansijskih sredstava**

## Članak 50.

Sredstva za financiranje izgradnje odlagališta opasnog otpada osiguravaju se iz sredstava proizvođača opasnog otpada i iz drugih izvora sukladno zakonu.

Sredstva za financiranje izgradnje odlagališta komunalnog otpada osiguravaju se iz proračuna jedinica lokalne samouprave, sakupljača otpada i drugih izvora sukladno zakonu.

Sredstva za financiranje izgradnje odlagališta tehnološkog otpada osigurava proizvođač tehnološkog otpada i iz drugih izvora sukladno zakonu.

Drugi izvori iz stavaka 1., 2. i 3. ovog članka su naknade propisane posebnim zakonom, darovi, krediti, sredstva međunarodne pomoći, sredstva stranih ulaganja namijenjenih postupanju s otpadom.

**Naknade proizvođača opasnog otpada**

## Članak 51.

Pravna ili fizička osoba koja svojom djelatnošću proizvede opasni otpad plaća naknadu sukladno odredbama Zakona o zaštiti okoline.

Obveznici, osnovica, visina, odnosno granica do koje se naknada može utvrditi, propisuju se posebnim zakonom.

**Naknada vlasnicima nekretnina**

## Članak 52.

Vlasnik nekretnine u čijoj se neposrednoj blizini nalaze prostori i objekti namijenjeni skladištenju, preradi ili odlaganju otpada imaju pravo na naknadu radi umanjene tržišne vrijednosti nekretnine.

Iznos naknade mora biti srazmjernan umanjenoj vrijednosti nekretnine.

Jedinice lokalne samouprave na čijem području se nalaze prostori i objekti namijenjeni skladištenju, preradi ili odlaganju otpada također imaju pravo na naknadu.

Naknadu iz stavaka 1., 2. i 3. ovog članka isplaćuje investitor.

U slučaju spora o iznosu naknade odlučuje nadležni sud.

**VI. NADZOR**

## Članak 53.

Nadzor nad primjenom ovog Zakona i propisa donesenih na temelju ovog Zakona obavlja Ministarstvo.

## Članak 54.

Poslove inspekcijuskog nadzora nad sprovođenjem ovog Zakona i propisa donesenih na temelju ovog Zakona sprovode općinski i kantonalni inspektori zaštite okolice.

Na rješenje općinskog inspektora zaštite okolice može se izjaviti žalba Ministarstvu.

Na rješenje kantonalnog inspektora zaštite okolice žalba se izjavljuje ministru Ministarstva.

Žalba na rješenje inspektora zaštite okolice ne odlaže njegovo izvršenje.

## Članak 55.

Inspektor zaštite okolice nadzire naročito:

- proizvodnju i postupanje s otpadom na području Kantona,
- rad pravnih ili fizičkih osoba koje obavljaju pojedine djelatnosti proizvodnje i postupanja s otpadom,
- vođenje zapisnika o postupanju s otpadom,
- nadzire uvoz, izvoz i transport otpada,
- nadzire prostore i objekte namijenjene skladištenju, obrađivanju i odlaganju tehnološkog i komunalnog otpada.

## Članak 56.

Inspektor zaštite okolice u slučajevima povrede ovog Zakona ili propisa donesenih na temelju njega, ovlašten je rješenjem odrediti mjere iz svog djelokruga, a naročito:

- obvezno uklanjanje otpada s mjesta koje nije određeno za njegovo odlaganje,
- privremenu obustavu rada, odnosno zabranu skladištenja, prerade ili odlaganja otpada, ako pravna ili fizička osoba ne ispunjava propisane uvjete za takvu djelatnost,
- zabranu skladištenja, prerade ili odlaganja otpada ako se ne provodi na propisan način,
- zabranu uporabe prostora i objekata namijenjenih skladištenju, preradi ili odlaganju otpada, ako ne ispunjavaju propisane uvjete.

## Članak 57.

Utvrđi li da je povrijeđen ovaj Zakon ili propis donesen na temelju ovog Zakona, inspektor zaštite okolice dužan je:

- podnijeti bez odlaganja zahtjev za pokretanje postupka nadležnom organu,

- predložiti ministru da kod nadležnog suda pokrene postupak za brisanje iz sudskog registra one djelatnosti za koju se utvrdi da za nju, pravna ili fizička osoba, ne ispunjava uvjete propisane ovim Zakonom,

- poduzeti druge mjere za koje je ovlašten.

## Članak 58.

Inspektor zaštite okolice može donijeti usmenu odluku u slučaju kada je neophodno otkloniti neposrednu opasnost za život i zdravlje ljudi, životinjski i biljni svijet.

Pismeno rješenje usmene odluke mora se dostaviti stranci u roku od 3 dana od dana donošenja usmene odluke.

Žalba na rješenje inspektora zaštite okolice iz stavka 1. ovog članka ne zadržava izvršenje rješenja.

## Članak 59.

Osobu koja baca ili odlaže otpad na mjestu koje nije predviđeno za njegovo odlaganje, građani su dužni prijaviti nadležnom organu - inspektoru zaštite okolice.

Nadležni inspektor će na temelju prijave pokrenuti prekršajni postupak i naložiti uklanjanje otpadnog materijala na teret osobe iz stavka 1. ovog članka.

Kada otpad odlaže nepoznata osoba na nekretnini koja nije određena kao mjesto za njegovo odlaganje inspektor zaštite okolice rješenjem će odrediti uklanjanje otpada u određenom roku:

- na trošak vlasnika nekretnine, ako je to pravna osoba,
- na trošak jedinica lokalne samouprave, ako je vlasnik nekretnine fizička osoba ili je nekretnina napuštena od njenog vlasnika.

Jedinica lokalne samouprave (općina), odnosno pravna osoba koja je podmirila trošak uklanjanja otpada iz stavka 3., alineje 1. i 2. ovog članka zadržava pravo povratka podmirenog troška od osobe za koju bi se utvrdilo da je izvršila nedozvoljeno odlaganje otpada.

**VII. KAZNE NE ODREDBE**

## Članak 60.

Novčanom kaznom u iznosu od 2.000,00 do 4.000,00 KM kaznit će se za prekršaj pravna osoba:

1. ako proizvođač tehnološkog otpada ne preda sakupljaču prateći list (Članak 21. stavak 1.);
2. ako proizvođač navede netočne podatke u pratećem listu (Članak 21. stavak 2.);
3. ako sakupljač i prerađivač preuzmu otpad bez pratećeg lista (Članak 21. stavak 3.);
4. ako sakupljač i prerađivač otpada preuzmu otpad koji ne odgovara podacima u pratećem listu (Članak 21. stavak 4.);
5. ako prerađivač ne dostavi primjerak pratećeg lista proizvođaču i Ministarstvu (Članak 21. stavak 5.);
6. ako ne označi spremnik s opasnim otpadom (Članak 24. stavak 3.);
7. ako pravna osoba ne vodi dnevnik s podacima o vrsti, količini, mjestu nastanka, načinu i mjestu prerade i odlaganja otpada (Članak 32. stavak 1.);
8. ako pravna osoba koja postupa s komunalnim otpadom ne dostavi podatke općinskom, gradskom ili kantonalnom organu nadležnom za poslove zaštite okolice (Članak 32. stavak 2.);
9. ako pravna ili fizička osoba koja postupa s tehnološkim otpadom ne dostavi podatke Ministarstvu (Članak 32. stavak 3.);

10. ako proizvođač otpada ne prijavi podatke o vrstama otpada Ministarstvu industrije, energetike i rudarstva Kantona (Članak 34.).

Za radnje iz stavka 1. ovog članka kaznit će se za prekršaj i odgovorna osoba u pravnoj osobi novčanom kaznom u iznosu od 500,00 do 1.500,00 KM.

Novčanom kaznom u iznosu od 200,00 do 800,00 KM kaznit će se fizička osoba koja odlaže ili baca otpad na prostoru koji nije predviđen za njegovo odlaganje (Članak 59. stavak 1.).

#### Članak 61.

Novčanom kaznom u iznosu od 5.000,00 do 10.000,00 KM kaznit će se za prekršaj pravna osoba:

1. ako odvojeno ne sakuplja i ne skladišti otpad čija se vrijedna svojstva mogu iskoristiti (Članak 17. stavak 1.);

2. ako sakupljač otpada ne označi spremnike i posude u kojima se otpad skladišti (Članak 17. stavak 2.);

3. ako proizvođač tehnološkog otpada ne izdvaja dio svog dohotka (Članak 20. stavak 1.);

4. ako pravna osoba ne zapošljava djelatnike s određenom stručnom spremom (Članak 25. alineja 1.);

5. ako proizvođač opasnog otpada ne osigura njegovo skladištenje (Članak 24. stavak 1.);

6. ako započne obavljanje djelatnosti bez rješenja Ministarstva (Članak 26. stavak 1.);

7. ako prijevozi opasni otpad s drugim otpadom (Članak 28. stavak 1.);

8. ako sakupljač ne dostavi prerađivaču opasni otpad u stanju u kakvom ga je primio (Članak 28. stavak 2.);

9. ako proizvođač opasnog otpada ne preda sakupljaču prateći list (Članak 29. stavak 1.);

10. ako proizvođač opasnog otpada navede netočne podatke u pratećem listu (Članak 29. stavak 2.);

11. ako sakupljač preuzme opasni otpad bez pratećeg lista (Članak 29. stavak 3.);

12. ako prerađivač opasnog otpada preuzme opasni otpad koji ne odgovara podacima u pratećem listu (Članak 29. stavak 4.);

13. ako prerađivač opasnog otpada ne dostavi primjerak pratećeg lista proizvođaču i Ministarstvu (Članak 29. stavak 5.);

14. ako proizvođač ne preda sakupljaču opasnog otpada izvješća o ispitivanju fizikalnih i kemijskih svojstava otpada (Članak 30. stavak 1.);

15. ako sakupljač ne preda prerađivaču opasnog otpada izvješća o ispitivanju fizikalnih i kemijskih svojstava otpada (Članak 30. stavak 2.);

16. ako bez suglasnosti Ministarstva izvozi otpad (Članak 45.);

17. ako bez suglasnosti Ministarstva transportuje otpad područjem Kantona (Članak 47. stavak 2.);

18. ako ne postupi po rješenju inspektora (Članak 65.).

Za radnje iz stavka 1. ovog članka kaznit će se za prekršaj i odgovorna osoba u pravnoj osobi novčanom kaznom u iznosu od 500,00 do 2.000,00 KM.

#### Članak 62.

Novčanom kaznom u iznosu od 2.000,00 do 8.000,00 KM kaznit će se za prekršaj pravna osoba:

1. ako započne obavljanje djelatnosti bez rješenja Ministarstva (Članak 15. stavak 1.);

2. ako proizvođač ne preradi i ne osigura skladištenje tehnološkog otpada koji je nastao obavljanjem djelatnosti (Članak 19.);

3. ako prostor, oprema i građevina ne zadovoljavaju propisane tehničko-tehnološke uvjete (Članak 24. stavak 2.);

4. ako odvojeno ne sakuplja ili ne označava ambalažni otpad (Članak 22. stavak 1.);

5. ako otpad ne odlaže na deponije otpada (Članak 35.).

#### Članak 63.

Novčanom kaznom u iznosu od 10.000,00 do 20.000,00 KM kaznit će se za prekršaj pravna osoba:

1. ako uvozi otpad radi odlaganja (Članak 39. stavak 1.);

2. ako uvozi opasni otpad (Članak 39. stavak 2.);

3. ako bez suglasnosti Ministarstva uvozi otpad (Članak 42. stavak 1.).

Za prekršaj iz stavka 1. točke 2. može se izreći mjera zabrane rada pravnoj osobi koja uvozi opasni otpad.

Za radnje iz stavka 1. ovog članka kaznit će se za prekršaj i odgovorna osoba u pravnoj osobi novčanom kaznom u iznosu od 1.000,00 do 2.000,00 KM.

### VIII. PRIJELAZNE I ZAVRŠNE ODREDBE

#### Članak 64.

Jedinice lokalne samouprave i uprave na čijem području se nalaze odlagališta, deponije dužne su za ista osigurati svu potrebnu dokumentaciju za rad deponije u roku od najdalje dvije godine od dana stupanja na snagu ovog Zakona.

#### Članak 65.

Pravne i fizičke osobe koje obavljaju djelatnost postupanja s otpadom koje ne pribave suglasnost iz članka 15. stavak 1. ovog Zakona u roku od godinu dana od dana stupanja na snagu ovog Zakona prestaju obavljati djelatnost postupanja s otpadom.

Pravne i fizičke osobe koje obavljaju djelatnost postupanja s opasnim otpadom koje ne pribave rješenje iz članka 26. stavak 1. ovog Zakona u roku od godinu dana od dana stupanja na snagu ovog Zakona prestaju obavljati djelatnost postupanja s opasnim otpadom.

#### Članak 66.

Propisi za provođenje ovog Zakona čije je donošenje propisano u člancima 6., 21., 22. i 30. ovog Zakona donijet će se u roku od 3 mjeseca od dana stupanja na snagu ovog Zakona.

Propisi za provođenje ovog Zakona čije je donošenje propisano u člancima 14., 24., 25. i 38. ovog Zakona donijet će se u roku od 6 mjeseci od dana stupanja na snagu ovog Zakona.

Propisima iz stavaka 1. i 2. ovog članka mogu se propisati prekršaji i odrediti novčane kazne za te prekršaje.

#### Članak 67.

Stupanjem na snagu federalnog zakona kojim se regulira oblast sabiranja, transporta, prerade i deponovanja otpada, nastaje obveza da se ovaj Zakon uskladi s odredbama federalnog zakona.

#### Članak 68.

Ovaj Zakon stupa na snagu osmog dana od dana objavljivanja u "Službenim novinama Tuzlanskog kantona".

Bosna i Hercegovina  
Federacija Bosne i Hercegovine  
TUZLANSKI KANTON  
Sabor

Broj: 01-011-197-14/00  
Tuzla, 2. 11. 2000. godine

Predsjednik  
Sabora Tuzlanskog kantona

**Dr. Izet Žigić, v.r.**